

四庫全書

集部

欽定四庫全書

兩宋名賢小集卷一百六十二

宋 陳思 編

元 陳世隆 補

梅谿詩集二

林知常惠白酒六尊仍示酒法作十韻謝之

老去生涯付盃酒種秫辛勤三百畝東臯遺法嗟失傳
蜜汁齏漿不通口邇來軟飽經月無豈有清歡對朋友

百錢強就村媪醉終夜蔬腸作雷吼先生祇把文字耕
妙意能施杜康手憐我新愁餘萬斛那更澆腸無五斗
分惠青州六從事秘法兼蒙傳肘後便同北海歌不空
免似東坡歎烏有嗟予偃蹇老更饕感激故人情意厚
會須續遣白衣來離畔黃花欲重九

九日飲酒會趣堂者十九人老者與焉既醒念不
可以無詩因用贈林知常韻示諸友

我似揚雄貧嗜酒筆作耕犁紙為畝辛勤耕植三十年

往往糟醅罕濡口今年九日甕盎空誰饌先生荷諸友
衰顏迎醉生嫩紅饒腹隨餐失饑吼菊花不上老人頭
酒盞聊傳此時手文字飲韓嘉數子禮法拘髡惟一斗
哀翁興盡輒先歸不待盃盤狼藉後坐客高談驚四隣
吾鄉已在無何有明朝黃花亦不惡俗眼無端自踈厚
酒醒聊記坐中人有似平原凡十九

陳元佐和詩贈以前韻

無功懶仕由堪酒故向東臯事田畝自慚耕稼非老農

歲入何曾給糊口通功易事覩無術漫闢書齋會鄉友
出技慙如鼯鼠窮說法強為獅子吼交游漸覺不在眼
老拙自知當縮手陳生慷慨真可人文似良金瞻如斗
論交何止十年前耐久遙期十年後把酒殷勤問黃菊
十年故舊寧多有士窮要使節義敦不見韓公稱子厚
北窗捉筆書惡詩醉中戲贈陳三九

周仲翔和詩贈以前韻

與子十年同把酒貧賤未能離隴畝今年依舊對黃花

會意何由笑開口老來鍾愛有三兒
邇歲從師得吾友祝螟方擬為羸
飛舐犢俄驚作牛吼幼兒已作一覺
夢大匠徒施兩年手乙子沈疴賴營
牧再生豈止由南斗嗟予屯厄世所
棄急難誰肯相先後論交最喜子善
終報德深慙我無有猶憐甲乙二孺
子莫景於渠意加厚煩君為吾嚴誨
之母惜鞭笞九十九

陳獻可宋孝先萬孝傑夏伯虎和詩復用前韻

準擬重陽會詩酒手種菊花凡數畝
佳節相逢俱可人

一一篇章堪適口揚庭醞藉更清新

陳晉宋間人顏謝

友愛鄉詞源浩萬斛

宋

下筆驚人風雨吼季梁蕭灑詩

如人飄然自是風騷手

萬

用之年少富文墨

夏

日出珠

璣不論斗誠叔思深希仲逸齊驅未識誰先後老朽那
能敵年少胸中空洞嗟無有張我三軍得數子造物遺
予非不厚明年秋戰豈無人雲夢定須吞八九

九日把酒十九人和詩者數人而已今已後期不

復追索許以來年九日還用前韻發一笑

勸君須飲文字酒勸君耕耨心中畝飲非文字猶聚蚊
心田不耕棘生口登高佳節豈易得況此相逢皆勝友
談傾坐上冰玉清興生筆下波濤吼我亦逢場聊戲劇
韻語殊非三昧手試投瓦礫已成堆辱報驪珠未盈斗
和之者寡豈陽春高才料恥居王後嗟我窮愁無以遣
酒債詩篇行處有與茲飲會類平原逃我詩盟獎高厚
如今並許隔年還直須日月逢重九

宋孝先示讀自寬集復用前韻

老去悲秋強自寬
少陵九日詩也予

欽定四庫全書

兩宋名賢小集
卷一百六十二

老境失幼子逢秋益悲凡所以強自寬者一寓於詩也錄自中秋以前古律詩數十篇目曰自

寬集

淵明酷愛尊中酒季子貧無負郭畝我生薄與二子同
俯仰人間亦緣口一室蕭然僅容膝毛穎陶泓自相友
會心終日堆聲讀排悶有時麤氣吼感秋詩集名自寬
雕琢更慙非妙手篇章不工如子固聲名敢望星之斗
宋生輒作過情語十韻殷勤為跋後譽之韓柳誰敢當
意古語奇吾豈有何如操矛時入室鍼我膏肓乃相厚

牀頭周易深且神毋惜往來論六九

再用前韻述懷并簡諸友

太白佯狂喜盃酒陳登豪氣恥求畝揮毫爛吐風月篇
濟世高談霸王口古人可作誰與歸白也吾師登可友
萬言窗下盃水冷百尺樓頭鼻聲吼丈夫未遇聊爾耳
肯向權門思炙手淨掃一室安吾貧晝閱詩書夜星斗
休論生天與作佛靈運甘居丈人後吾儕慎勿慕富貴
鳴鼓定須攻冉有但願相從文字樂交情合向窮中厚

倚看前席坐間人平步登瀛叅二九

鄭遜志胡叔成謝鵬劉敦信萬廓鄔一唯和詩復

用前韻

前日中秋一壺酒交朋解散歸南畝把盃邀月止三人
中有客來從谷口鄭首登詩壇出險語張我孤軍真畏
友重陽佳句更奇絕西風猛向松關吼中庸伯始遙遙
胃胡穎然作賦吟詩手謝客篇章似春草分得家傳才
一斗謝句法天然自圓熟長慶詩豪今有後劉妙齡能

作老成語必大奇兒亦希有萬鄔郡太守司馬孫文與

其人兩溫厚鄔我與數子無薰蕕文字相從十常九

九日會飲予為唱首自和凡數篇皆因事叙情爾
未作重九詩也今再和一篇每句用事而不見姓
名末聯外餘皆畧存對偶必有能和之者

獨坐東籬歎無酒種秫西疇故盈畝菊花叢畔來白衣
桑落杯中付饞口汝南風俗有故事龍山宴集多佳友
靜聞彭澤三徑香遙想藍田雙澗吼順時習射馬嘶風

隨俗登山囊繫手慈恩塔冷舊衣冠戲馬臺空古刁斗
三嗅馨香感慨中細看茱萸醪酹後應制賦詩人孰在
坐湖聯句今還有明朝見花心已別此日登高意宜厚
日月並應節物嘉獨恨今年無閏九

過盤山宿旅邸

一嶺迢迢十里賒行人半日踏煙霞青山遮莫盤千匝
歸夢何曾不到家

宿浮橋

落日丹丘下西江十里西浮橋
通古道逆旅傍清溪夜
靜水聲細曉陰山色迷
吾鄉在何處天遠白雲低

西征

紹興建元二十二良月壬午時
丁未王家辭弟游帝都
出門滿眼思親淚鵲鵲送我
過原隰朋友攜尊宿蕭寺
朝離黃塘惜分別莫宿青山
嗟獨自初心滿擬游鴈山
行止非人輒乖異黃巖留連
越三宿故舊過從日沈醉
鄭生伴我千里行近世人
無此風義皇華亭上一回首

陡覺眉頭起鄉思西江十里浮橋邊把酒登樓吟擁鼻
山行初逢建子月入眼梅花已春意前觀三渡覺非舊
下視兩灘真可畏渡頭仙人還笑我髭鬚如棘猶名利
欲入天台觀石橋行來匆匆未能遂途中邂逅張老丞
廷玉十五年前樂清尉自嗟吾非沈謝輩面目從來苦難
記飛泉枕上夢成魔達旦思家何曾睡細雨濛濛入關
嶺旅邸重尋舊題字雨脚微收過天姥洗出峯巒疊蒼
翠劉阮祠荒土猶赤溪山真是神仙地道傍石現小金

仙傳舍荒涼誰廢置柘溪竹染兒女痕石嶺松含棟梁
器路入南明觀石佛樓閣宮堯更深邃八年行役兩來
游岩上題詩記前事乘興剡溪尋故人久別相逢雜悲
喜義風吹水送行舟越國江山滿瞻視十四歲娥孝且
烈三百里湖明更媚千巖競秀壑爭流終日貪看趣遙
寄西興渡口聲如雷銀浪崔嵬魄驚悸江神為我風色
平天闕煌煌瞻象魏賢關訪舊話酸辛更食齋鹽舊滋
味學官欲以職事留自媿非才力辭避觀臺雲物端可

書宮線初長日南至龍山就舍觀大禮儀仗森然典文
備人臣貴盛古今無秦公父子俱為使景靈告謝樂聲
回鵷鷺花枝侈君賜西游連日覩天顏和氣氤氲散
憔悴歲云莫矣却歸來捉筆書為于役志

周德遠植瑞香於窗前戲成一絕

主人貪睡為貪香花植窻前意味長見說有時魂夢裏
化為蝴蝶遶花旁

海棠

欲與春爭媚嫣然一笑芳雨中如有恨疑是為無香

白若遇水以小舟從石門渡勢危甚因書數語示

圖南文卿時八月二日也

歸途阻秋潦溪漲不可涉迂從石門渡未見心已怯壯
哉龍伯宮幽據鴈山脇巖如峙城壁南北本相接衆流
欲朝宗天為開度業泓澄潭百尺艤晚舟一葉吾生何
自輕內顧無可挾所賴二友生千里同負笈忠信儻可
仗免作飛鳥帖來歸從剡溪山水頗涉獵石齧天台舟

浪拍臨海楫可曾如此境令我魂震懾連年作行客川
塗但取捷不因風雨暴誰瞰遠步屨茲渡雖云惡觀覽
意亦愜漫賦石門篇添入剡游篋

孟甲孟乙好蓄古錢因示以詩

世人多好錢今汝獨好古書中閱平準壁上按圖譜廣
拾漢五銖遠及周九府惜哉生我家此物罕曾覩百中
時得一喜笑見眉宇所蓄雖不多其志頗可取問閭富
家子繞牀堆阿堵一字不識丁碌碌何足數更宜移此

力典墳讀三五縱未到聖賢定可過乃父

東園小閣丹粉一新昌齡有詩次韻

小園小閣無奇新但喜有酒堪娛賓西疇種秫可自釀
不用勤買拋青春月明星稀烏擇木吾愛吾廬堪寓目
須知主父五鼎珍不似王猷數竿竹丈夫未遇當安貧
帶經且作鋤園人詩酒過從老兄弟一笑可破雙眉顰
見說西園相繼闢好將因果同栽植子孫清白世相傳
莫同阮氏分南北

夢齡得男老者喜甚湯餅會中出詩以賀

梅溪佳氣夜葱葱果得奇兒應夢熊湯餅笑歡良不淺

桑弧時節稍相同

予以十月二十八日生
猶子以二十九日生

喜將老眼看

猶子首出新詩賀乃翁從此吾門如謝傳芝蘭玉樹滿庭中

次濟上人韻

老來未厭短檠光又集青衿就故鄉却荷道人能具眼
不同時輩有他腸心傳潛澗源流別首出新詩意味長

我亦筆頭為佛事未應中國異西方

浴佛無雨

俗言浴佛天必雨今年浴佛天愈晴招提鐘磬集梵侶
世尊塵埃思一清紛然膜拜口誦偈舉頭看天紅日明

或云天意與佛拗

老行者云天
與佛打拗

不放雨師龍伯行天雖

不雨佛亦浴誤此億萬蒼生情廟堂何人職調變勸天
與佛無使爭沛然一雨四方足億萬蒼生俱沐浴

題郭莊路

南山有井名黃花我卜別業臨其涯酌泉漱石思往事
天遺景與名俱嘉東籬種菊隱君子悠然凝望南山賒
茲人高躅已千古三徑蕪沒堪咨嗟我生本抱丘壑尚
誤涉塵世爭浮蝸十年太學志未遂歸來隴畝躬桑麻
草莊新築亦不惡青山遠近光交加會須移住效杜老
終賦歸去師陶家新涼入郊九日近西風漸欲吹烏紗
龍山風俗有故事撩我清興凌煙霞

度鴈山

鴈山五經眼茲行尤可觀初冬天氣佳鴈歸山未寒有

日照幽谷無雲翳層巒入境見祥雲

祥雲峯

振衣登馬鞍

馬鞍嶺

瀑水飛玉龍

兩龍湫

羽旗導翔鸞

展旗峯翔鸞峯

石柱屹天

天外峯

卓筆書雲端

卓筆峯

靈峯觀石室杖履穿巔岼山

禽知我來好音若相歡

登羅漢洞有鳥鳴絕頂聲極可愛

羣峯列春筍

丹青狀尤難

靈峯新創丹青閣

行色覩匆匆更約他時看

臘日與守約同舍賞梅西湖

西湖處士安在哉湖山如舊梅花開見花如見處士面

神清骨冷無纖埃不將時節較早晚風味自是花中魁
暗香和月入佳句壓盡今古無詩才武林深處景益勝
十里眼界多瓊瑰北枝貪睡南枝醒杖履得得纔出來
旅中茲游殊不惡況有佳友銜清杯手折林間一枝雪
頭上帶得新春回

同舍再約賞梅用前韻

梅溪野人真野哉老眼長為寒梅開
却來西湖探春色濡毫一洗胸襟埃
却將梅花比和靖花與人物俱奇魁

同行二十五佳客一一盡是離騷才新詩一出花價長
糠粃桃李奴玫瑰湖山已稿處士骨風月未厭吾儕來
欣聞好事約重賞準擬餐玉嘗春杯預辦長牋收白雪
載取十里清香回

興化簿葉思文吾鄉老先生也此泐檄見訪既別
寄詩二十八韻次韻以酬

莫年初仕塗暇日但書策儒生餘氣習筆端事揮斥政
學兩踈謬篇章稍沈溺楚東會詩豪酬唱奏金石逢場

爭出奇遇險或遭厄忽泝三峽流遙經數州驛廬山看
未足巫峯過尤惜西郊祠卧龍東屯弔詩伯飛飛猶倦
鳥秋風送歸翮同行得嘉友鏖戰交鋒鏑弛擔白蘋洲
天日去咫尺忠誼懷魯公霸業悲項籍

湖州設廳
舊祠項籍

奉詔

還故鄉齒落肌瘦瘠涕泗拜松楸荒蕪剪荆棘心期樂
田里誓不綰銅墨索雖無陸金歸幸全趙壁陛下忽誤
恩泉南又分職入閩如入蜀枯腸復冥索腰緣病減圍
髮為悲添白風仰秦君高節慕姜相直惡語誰流傳同

僚誤刊刻吾鄉老先生吏事以儒飾新篇似庭燎遠寄
箴我癖把酒欲細論何時再泂檄陽春七十首光豔萬
丈射招邀屈原魂收名子厚魄驚開老病眼喜見墨妙
蹟願公倡斯文用夏變蠻貊

近世作詩文者多溺於異
端之學正願郎先生痛革

其弊

欽定四庫全書

兩宋名賢小集
卷一百六十二

十四

兩宋名賢小集卷一百六十二

欽定四庫全書

兩宋名賢小集卷一百六十三

宋 陳思 編

元 陳世隆 補

梅賾詩集三

送王司業

元龜

守永嘉

中興天子初龍翔
臨軒策士當維揚
艱難果見異人出
龍虎甲乙俱非常
先生大對過晁董
指切時務言激昂

麟經絕筆二千載收拾紙上生光芒自從曲江到今日
勁氣獨得南方強權門用事手可炙申張亦減平生剛
先生閉門玩文象簸弄日月潮之陽帝憂南國命共理
素連二政俱循良公道方行正人用詔起韓愈師虞庠
先生不作進學解直言慷慨投封章一麾出守山水郡
十行詔墨加恩光東嘉得賢類京兆前政有張今有王
前守張子韶張公到官席未煖猶有遺愛如甘棠先生況是
儒宗師斂此大惠施一方入境顧問民疾苦下車宜誅

吏奸賊首延珍孺坐賢榻無使楊墨登門牆河內借恂
豈容久宸衷念賈殊未忘鯁生樞衣恨太晚執經未獲
時登堂私心竊喜父母國聖恩特許來龔黃願同何堅
首率化歸見潁川鳴鳳凰

和符讀書城南示孟甲孟乙

性無有不善茲言聞子興學所以修性揚雄著之書欲
知人之生靈臺湛然虛習善裕乃身習惡喪厥初下惠
與盜蹠不生兩門間所游一不同相去霄壤如是以吾

夫子詩禮教伯魚當時非義方聖門亦蕭疎我似杜陵
翁有兒最憐渠徒愛不知教懼如驢與猪詎望登丹霄
折桂騎蟾蜍粗令有聞見免為甕中蛆牛角入小學首
誦仲尼居要知先孝弟餘力哉乎歟我家素孤寒金玉
苦無儲舊業止青箱辛勤二星餘遺爾以清白爾曹宜
念且性情乃良田學問為耘鋤勿患遠難致跬步馳蹇
驢勿憂年不逢六經有新畬勿隨奔競流伺候人庭除
勿學田舍兒黃金買冠裾在我能自修不患無聲譽我

久困筆硯退思老山墟拭眼看爾曹庶使愁腸舒詩篇
和韓公座右宜書諸青春最堪惜勉矣無躊躇

和苦寒

羲和錯冬令寒燠常相兼在人為不常時焉作貪廉玄
冥當用事如忌還如謙宜寒噤不噓羣萌誤抽尖既燠
俄吹冷夜寐黑不甜水行失其理厥疾不可砭前日當
孟冬雷聲震銅蟾三日輒大雪飛花眩觀覘逮此始踰
月屢變寒與炎晨起坐東窗陽光快思霑霜畦秀蔬苗

欣焉自腰鎌頃刻變凜冽枯藤怯提拈齒牙戰霜風縮
舌疑銜箝架軸紛掀翻誰能正牙籤酒杯覺無力瓶罄
勞頻添貂裘尚不煖況無或衣縑兀坐擁黃綢脰作寒
龜潛氣血栗肌體涕唾冰鬚髯紅爐熾薪炭旋覺寒星
殲靜思天壤間萬類何繁纖路傍泣凍餒海角愁廢淹
羽毛有不庇腥血有不燂豈堪當此時可以吾身占殷
勤語妻子汝勿多怨嫌破被尚禁絮漏茅可添苫人生
苟知足處此意亦恬但願王化行東西俱被漸堯天日

舒長有目皆可瞻寒生在陋巷甘心事齋鹽何須傍人
門炙手隨姦憐耽耽王侯宅笙歌下珠簾寒暑止溫涼焉
知有窮簷否泰送往來禍福相依黏勿用倚彼玉自分
安吾廉飽腹日三飯蔽形衣一簷祁寒勿怨咨庶用懲
無厭

陳大監用賞梅韻以贈依韻酬之

潁川大人賢矣哉青眼喜為清流開詩章翰墨兩奇絕
筆下一字無塵埃品題人物獎後進縉紳樂善公為魁

東嘉賤子生太晚猶幸識此真人才
竭來西游也不惡錦囊所得俱瓊瑰
區區科第何足道此行似為詩篇來
客中拜貺更重複丙穴魚及郫筒杯
大監近以寒鄉故魚水見貺
舊問歸索首言帶得公詩回

大監復贈詩紙尾有留飯語再用韻以謝

平生漫學乎歟哉心茅胸棘鋤不開
得公新詩一再讀便覺胸宇清無埃
銀鉤妙畫發光豔照眼有如參與魁
鰕生肺腑非太白公似工部尤憐才
旅中屢獲錦繡段

但媿欲報無瓊瑰豫章一榻不妄下賢非徐孺安敢來
荷公此意最敦篤一笑當奉論文杯鄉心如飛不可遏
更為長者遲遲回

謝榮帥薤贈御書孝經用陳大監韻

輦轂之下先彈壓茲言雖佳未足法丈人身居彈壓地
撫字心勞民自洽神聖當天萬物春王畿共理嘉得人
雲漢昭回賜優渥不特為公端為民聖經一章公獨得
黃堂蔥鬱生春色賢哉名卿才大夫匪懈事君端可則

石刻分餘猶及我榮耀驚聞浙江左從今部屋光屬天
更有寵褒雲八朶某前日廷對蒙宸翰八字之褒願公勉為不朽傳長
如治吳與治川要令列郡法清白了無一吏橫索錢

陳郎中

公說贈韓子蒼集

唐宋詩人六七作李杜韓柳歐蘇黃近來江西立宗派
妙句更推韓子蒼非坡非谷自一家鼎中一鬻曾已嘗
丈人珍重贈前集開卷爛然光焰長詩如此公固足貴
賜出仁者尤難忘兼金白璧不足道願寶茲集為家藏

鰕生幸脫場屋累老境欲入詩門牆古詩三百未能學
句法且學今陵陽

題天台國清寺

十里松聲接澗泉清音入耳夜無眠

寺有清音亭

宜於四絕

中稱絕

四絕事見寺碑

誰向三賢後更賢

豐干寒山拾得

寺就已無陳

日月

寺建于陳而成于隋

時清長是宋山川

初智者云此寺成國即清矣故號國清真

廟時賜號景德國清

明朝杖履尋劉阮不待桃花入洞天

臘月望日出郊探春游告成觀謁大禹祠酌菲飲

泉遂至龍瑞宮觀禹穴薄暮而還

禹塋稽山不記年丹青落盡廟依然神文秘在藏書穴
儉德流為非飲泉龍瑞峯巒高近日鑑湖煙水濶浮天
東州佳處畧經眼自笑好奇如馬遷

迎春遇雪

飛雪送殘臘帶花迎早春西疇農事及媿是不耕人
元日冒雪赴天慶觀朝拜既趨府拜表還舍飲屠
蘇酒因思去年元日亦不在家感而有作

幕府初官媿不才琳宮朝拜獲參陪
籃輿去踏攬先雪蓬鬢歸銜最後杯
禹穴地幽寒未歇堯天日近暖先回
年年元日身為客孤負吾廬溪上梅

賀何正言用蔡君謨韻

御筆親除直諫官翕然輿論已騰歡
正人得路言無諱聖主虛懷聽不難
莫厭封章箴袞闕要令奸膽落毫端
鯢生雅服陽公德時把昌黎諫論看

題壽樂堂用東坡韻贈楊元賓僉判

欽定四庫全書

兩宋名賢小集
卷一百六十三

七

蓬萊閣下蒼龍古萬壑千巖擁仙府壽樂堂西面卧龍
壑月巖風滿窻戶蒼松溜雨大十圍綠水浮荷深一股
作堂主人久黃壤仁智風猶似鄒魯詩仙騎龍已上天
妙句光芒照寰宇青山偃蹇只如昔高處去天無尺五
楊侯淮泗老儒學文字撐腸筆風雨竭來贊幕古東州
要與青山作盟主虛堂宴坐飽風月此外一毫端不取
他日從公物外游貝闕珠宮酌瓊乳

與趙安撫乞疏獄

小麥青青大麥熟秧老欲移蠶欲簇皇天彌旬作淫雨
害及農桑一何酷麥枯秧腐蠶不絲無食無衣豈能育
使君今世賢方伯政過龔黃同舜牧儻金蠲放官與私
喜氣歡聲傾比屋仁風已慰黎庶心誠感蒼穹理宜速
胡為烝泄尚如許陰沴干陽埋日轂宣惟泥濘困牛車
更恐魚龍上平陸閭閻競畫指日蠻香火遙祈上天竺
傷和無乃有冤民蠹政尚疑多大族使君有術開青天
按劾奸賊疏滯獄

李資深贈古瓦硯及詩

世貴銅雀硯常患偽亂真千金買渴雀虛名何足珍李
生心好古身困道不貧得此佳陶泓製由萬道人殷勤
持贈我器古詩清新置之憲几間日與毛穎親未能草
太玄姑用注獲麟羅文及端紫貴幸無比倫屈爾居蓬
窗與我同艱辛研磨媚權貴揮染勞精神茲我所不敢
銘以書諸紳

送黃機宜游四明

名子魯

游宦東州識老成坐間談笑欲風生人如元祐氣尤直
詩不江西語自清雪棹非緣尋舊隱夜牀端欲對難兄
行聞太史奏星聚四皓聯珠隱四明

黃兄弟四人皆皓首號所居曰橘隱

堂

次梁尉韻

探春連騎入山城更喜梅仙亦會盟

梁後至

文字偶同吾

輩飲聖賢滿為使君傾

安撫尚書以僚屬游山送酒六十樽諸公自山中回晚集於教

授廳為

文字飲詩逢好景天然好山為清流分外清瀟灑宗之

最年少我慙叨預八仙名

梁最年少

和喻叔奇游天衣四十韻

稽山高入雲鑑湖濶浮空禹秦有餘迹晉宋多鉅公我
來歲及周夢寐懷清風茲欣天氣佳扶桑欲曛曛駕言

天衣游盍簪盡駕鴻經夕戒行李如期集仙宮

早會于天長觀

聯騎出城南行行指秦峯千巖競吐秀眼界清無窮招

提在何許十里松陰濃林端忽鐘磬與客為先容羣簪

擁花界雙佩鳴寒空試將比天台大畧如思豐

天台國清山水

秀絕有思豐堂尤可觀覽首讀邑皓碑妙理開昏蒙細觀元白詩丘

壑羅胸中蕭壁尚堪面

寺有面壁
二大字

梁薪幾經烘

寺有梁
時薪火

見李公
墓詩茲宮現有相禪客談無同朝陽最薪絕白雲抹

其胸

朝陽峯
最奇

杜鵑天下無至今映山紅鷄僧始開山道

業聞清衷思舉照不起高價傾江東架梁縷黃金宮女

自針工昭明親抱送禮意何太恭白馬忽渡江臺城喪

英雄國破遺衣在丹青落塵容

寺舊有梁昭
明太子畫像

我輩皆書

生意氣飄如虹蠟屐共尋幽寧求香火功載酒懷賀老

招隱思戴顒賦詩效吹臺一飯敢不忠況我賢使君德
宇尤疎通楚醴餉百榼白衣走山中嗟余何為者天資

媿倥侗謬與酒中仙偶同戴山松

戴山有八松

同年妙詞章

況有山水供古詩如古琴山高水溶溶背囊小溪奴捧

硯長鬚僮

叔奇題名

勝游與佳作二美今具逢品題偏羣英

波瀾及孤蹤掬水弄花句比擬何凡庸

掬水月在手弄花香滿衣乃于

良史游天衣寺詩也

茲會如蘭亭同行類荀龍盛事在詩史奚用

呼畫工

秦望閣

紙上觀秦尚過秦
那堪山作眼中塵
為言高閣登臨者
莫作秦人視越人

競秀閣

憲臺高閣偶躋攀
萬壑千巖指顧間
山色元來本無競
人心自是錯看山

鵝池

鵝鵝能鳴異衆禽
池邊墨客最知音
世間都是山陰姪

應恐悞猜君子心

次韻周堯夫贈睡香

長向風前臘後開
要將風味鬪梅魁
名從廬阜夢中得
根自鄮山嘉處來
風折錦囊香不斷
日烘寶蓋翠成堆
定須移向梅溪去
栽伴吾廬桂與槐

次韻濮十太尉喜雨

去歲秋大水民食方苦艱
丁壯尚流離而況白與斑
今春又不雨事與安危關
使符下列郡呼嚮舞童鬟
投文

責老龍貪睡何癡頑我聞救災術乃在人事問興師古
有衛決獄唐稱顏年因弔伐有雨送輅車還嗟此旱魃
虐和氣知誰干半歲幸一雨人心寧不歡麥秀禾可植
田里庶少安上紓當宁憂吏責亦稍寬我家蕭峯下山
長路漫漫東臯有先業頗亦知艱難歸耕願及早免起
將蕪歎

次韻濮十太尉題禹穴

寰瀛三十六名郡越在東南雄四鎮宛委周回三百里

草木山川有光潤泰山鑑水蘊秀異人物風流夸漢晉

傳聞禹穴自太史好古無人若為問

韓退之詩云越俗不好古流傳失其

真杖履飄然尋洞光照眼千巖若攢刃細看盤石心愈

凝遐思丹書氣猶振禹貢無傳豈其闕遁甲所書何足

訓彝倫叙自九疇錫水土平繇五行順洛書六十有五

字玉業巍巍此途進八卷飛沈天與泉茲說荒唐理難

信吾儕去古恨太遠企首難窺禹牆仞穴傍有井清且

甘一酌端能洗驕吝

女子生日

五月十二日

吾女何時見薰風欲半時年齡今稍長禮法要須知好
讀班姬誠休吟謝女詩萱堂有慈母淑德可為師

泊桐廬分水港

何處繫歸舟桐廬舊日游港從分水出亭瞰合江流

江合


亭疊嶂雲披絮遙天月吐鉤紛紛釣魚者無復見羊裘

查元章自成都走書至江陵并貺蜀牋附子

芝蘭道山舊邂逅夔江邊會合止半載別離又經年君

猶滯使軺我忽移雪川東歸不及見西望心悠然尺書
走健卒追上江陵船殷勤贈遠意藥百紙以千吾老苦
多病得藥年可延靜思苦口味奚止沈痾痊但非造樓
手誤辱文房牋待將君詩文傳寫千萬篇書言作二記
付與夔人鐫捍波記修壘濟渴記義泉深慙郡政謬濫
託雄文傳君才高輩流君譽藹民編雅志在活人何心
肯流錢當宁正念賈諸公咸薦賢定歸玉筍班慷慨旒
床前所陳必堯舜那肯談武宣早趨舍人裝行著祖生

鞭我冠儻未掛苔溪遲言旋



欽定四庫全書

兩宋名賢小集
卷一百六十三

十四

兩宋名賢小集卷一百六十三

欽定四庫全書

集部

兩宋名賢小集卷一百

六十五

詳校官中書臣閔思毅

助教臣常循覆勘

總校官編修臣王燕緒

校對官編修臣孫希旦

謄錄監生臣劉亮采

欽定四庫全書

兩宋名賢小集卷一百六十四

宋 陳思 編

元 陳世隆 補

梅谿詩集四

次韻梁尉秦碑古風

姬嬴遺蹟存者希世傳石鼓稽山碑石鼓揄揚得韓子
文與二雅爭驅馳秦碑今大頌功德埋沒草莽無人知

或言山頂石猶在上有虎豹龍蛇螭神藏鬼護荆棘蔽
崖懸磴絕登無岐廣文好奇穴探禹梅仙喜事僧尋支
支適昔游越中好山水梁我贊其行要親覩勿受世俗
仙宿雲門訪古迹於僧

流傳欺望秦秦望兩嶺絕何山壁立東南涯豐碑屹植
最高處不知磨滅從何時剔苔掃墨了無有模糊片紙
亦足奇濃雲霽黯將雨古木槎牙蟠老枝歸來走筆
出險語訶政叱斯同小兒詩成得得寫寄我詞嚴意偉
法退之我聞秦人滅六國酷若犬磔臨江廩先王法為

秦所負負秦況有秦有司五經灰飛儒濺血堯舜周孔
何能為上蔡獵師妙小篆奴視俗本徒肥皮東封泰山
南入越大書深刻光陸離沙丘風腥人事變鬼饑族赤
誰嗟咨漢興萬事一掃去惟有篆刻餘型儀磨崖欲作
不朽計其如厯數不及期蚩尤五岳紂漆器人物美惡
寧相疵我雖過秦愛遺畫南山入望頻支頤不須嶧陽
訪棗刻不用遷史觀雄辭虛堂默坐對此紙閉眼暗想
君勿嗤要知秦碑沒字本却類周雅無辭詩

秘書省後園修竹可愛胡正字憲有詩次韻

不俗更嫌俗風枝時拂牆青青映藜燭細細雜芸香勁節老方見清陰寒欲藏蕭疎似吾輩味向靜中長

次韻洪景盧編修省中紅梅

不為怕寒貪睡遲東君妙意端可知雪英零落眼界寂
放此孤瘦紅南枝蓬萊更向逸遠地

園在著廷後

草木寧有

天嬌姿冰容戲作桃杏色醉臉雅與神仙宜江兄蠟友
已前輩黃生後出非同時丹心獨與勁節侶疎影共浸

清漣漪騷人相顧最不惡何用車馬紛蚩蚩典衣莫惜
共攜酒對花一展思鄉眉

李德遠寺簿敢言勇退今之古人也東嘉王某賦
詩以高其行

吳山蒼蒼烟靄橫皇都日日春風生利塗捷勁走輪轂
古道荆棘惟君行吳江洪濤拍天洑萬楫千帆日相踵
六鰲入釣猶不歸急流知退惟君勇斜川勝事今臨川
錦袍風月追謫仙芋魁豆飯吾亦有脫屣有媿君翩然

我輩情鍾惜離別為國惜賢情更惡江頭送別春尚寒
回首冥鴻已寥廓

送胡正字

憲分韻得來字

胡上書言事得祠還鄉同賦詩者七人以先生

早賦歸去來為韻

武夷之山高崔嵬武夷先生賢矣哉山中高卧如孤竹
顏蒼節勁清無埃吾君養老過西伯不遠千里歸乎來
胸中萬卷可醫國首薦廊廟真人才
胡上書薦人言朝張和公
奏暮必逐天顏獨為忠言開崇文三館不浪闢端為天

下收奇璞平時論議即涵養富貴豈以三緘媒西京老
儒作符命蒼黃投閣良可哀何如皇朝有歐范開口不

憚于霆雷

文忠文正二公皆以館職言事

先生力學到前輩一時盛事

光麟臺宸衷宵旰急忠讜佇觀前席延鄉枚先生掉頭
竟不住扁舟自載高風回道山游從盡英雋顧我晚進
寧容陪梅花滿枝柳弄色賦詩送別同銜杯吾廬三徑
亦荒草松菊怪我何遲徊

次韻昌齡至樂齋讀書

端慕顏回樂真同陋巷居息心容膝地得趣滿牀書
短燈宵永窻明日晷舒相看有修竹心為主人虛

同錢用明用章游白石巖

謝公好山水得郡古東甌造物借佳境雅志多不酬
松蘿蔽鴈蕩烟靄埋龍湫行田徑白石不到仙山頭
寥寥數百年天付黃冠流巍然萬仞崖壁立東南州
誰將補天手化出白玉樓兩龕藏洞府中有羣仙游
上通尺五天
天下接三神洲飛泉落巖腰碧澗鳴山陬羣峯真培塿

滄海為渠溝隘視人間世萬象同蜉蝣我家鴈山陽崎
嶇厭經丘翩翩錢公子呼我尋巖幽初驚小雨密忽掃
羣陰浮杖履窮巔岼一洗塵埃眸山林有真樂富貴何
足求但願乞二山不願萬戶侯

二山白石
石鴈蕩

李少和像

少和辛苦學飛仙遺像今猶在洞天都似先生能辟穀
何須太守為行田

左原詩三十二首

東高山

左原有四高山在乙辛丁癸之位術者目為四貴人東山最高上有五峯其一

曰宋家尖也

峯頭日出已停午山半雲橫疑在天要使名如越山重

直須人似謝公賢

越之上虞有東山乃謝安石高卧處

西高山

西高山者數峯稠疊前山如几俗謂西山平最高處謂之杜鵑花尖西山峯巒

最多術者謂之旌節山

壓頂花枝紅欲燎導前旌節開如訶倚窗挂頰時時好

何止朝來爽氣多

南高山

山在縣治東北俗呼縣後山夜聞更鼓聲間有地名小鴈蕩

山後風來聞縣鼓蕩中秋至集賓鴻我歸種菊東籬下
長在悠然眼界中

北高山

予家之後山也左原之山惟此山最奇秀翼然如翔舞狀上有尖峯

羣山如圓秀回環秀拔羣山是北山我恐山中猿鶴怨
移文未至已先還

龜山

俗呼黃嶼術者謂真得龜形

衆山環遶一山橫形似真龜勢欲行不向九江資納錫

臨溪曳尾自全生

卧虎山

在原之水口形如卧虎
舊有淫祠俗呼廟山

昂然虎踞一原東回首耽耽氣象雄
不放衆山隨逝水
溪頭高卧自威風

梅溪

在北高山之陽去孝感井二十步溪至小
以井為源予家其北溪之南有水如帶通

謂之梅溪溪名舊矣莫
知所自予植梅以實之

我向梅花溪上家
幾看清淺浸橫斜
手栽木已如人老
雪鬢蕭疎對雪花

楊谿

梅溪東流四十五步合原中數水而為楊谿谿稍大楊氏世居焉故以姓得名

一澗泓澄會衆流肱分俄類婺溪頭

辛巳秋水分為二

臨溪更

種青青木故事端同柳柳州

戲綵巖

原之西山有巖如屏上有尖峯俗曰白巖然巖色爛斑如施五綵故以戲綵易

之

烟霞屏障列西岑戲綵標名始自今我過巖前每流涕
斑衣空有老萊心

杜鵑巖

在戲綵巖之東巖頂稍平上多杜鵑花故以花得名予家寒食九日必登是巖

游宦三年樂事違巖花笑我鳥催歸歸來又被巖花笑

笑我登巖何太稀

杜鵑花一名巖笑子還家將一載竟未登巖

碁盤巖

杜鵑巖之北

杜鵑巖北一拳石石面平平堪奕碁路僻山深罕人到

爛柯仙客未應知

撒水巖

在戲綵巖之北

龍卧靈湫志未伸時時噴水撒行人雖然未救蒼生早

聊欲澄清世上塵

松羅巖

在原之西北有山隔之四面壁立可梯而登上平北有水可汲能容數百人產

松羅木因以得名建炎間有謀避難是巖者予嘗往觀之非活路也

插天萬仞絕攀躋巖頂松羅不是栽廊廟須材作梁棟
人間斤斧可能來

障巖

在戲綵巖之北壁立如障其色青黑有石方而直聳而有稜長者數尺可植庭宇間

巖如法吏面清冷石似端人正直方誰解移茲障邊境
敵騎安敢肆猖狂

人面巖

在原之西

看盡人間古與今
蒼顏一任蘚苔侵
豈惟有面如人面
更喜無心似獸心

天柱巖

有二一在三井之北
一在松羅巖之側

鴈山一柱插雲霄
三井松羅柱亦高
蓬葦深懷杞人念
擎天端賴柱堅牢

幞頭巖

在原之西北地
名烏石頭田間

閑處身宜及早抽
山林遲我掛冠游
不須花裏尋腰帶
且向田間置幞頭

宋家尖

在東高山

皇恩西被復東漸四海蒼生盡仰瞻
畝微臣猶戴宋結廬長向此峯尖

小鴈蕩

在原之南山以鴈得名
曰小者以別大鴈蕩

歸鴈行飛集澗阿不貪江海稻粱多
峯頭一蕩雖然小飲啄猶堪避網羅

左嶺

在原之南山

北望吾廬山最好南通蕭寺境逾幽

嶺之東南有明慶院

白雲夜

向原中宿幾度隨人過嶺頭

左湖

在原之東人東曰湖邊

漁樵歟乃日相呼舟楫生涯在畫圖我與漁樵同隱逸
不須乞作自家湖

萼湖

在楊溪之南吾鄉無萼菜獨此有之此詩乃舊日作

水晶銀線滿湖中

先人詩云莖抽銀線細根結水晶寒

遙與吳江氣象同

我輩他年厭游宦思歸應不待秋風

南瀑布

在南山之下上接小鴈蕩

飛瀑來從小鴈蕩靈源頗類大龍湫矩羅尊者不須占
乞與山翁取次游

北瀑布

在原之西北山腰間俗名主潭

茲潭誰主復誰賓清世寧容有隱淪獨我山林養衰病
不妨來作主潭人

嘶水澗

原之南有左嶺水北流入于原中水苦嘶晴而嘶則雨雨嘶則霽水忽鳴忽止

嘶曰

嶺頭寒澗遠無聲夜靜風恬忽自鳴山水有靈人不識

老農常用卜陰晴

鴈潭

原之西南三井山之下吾先人九日常集賓朋于此因命是名

九日登臨澗水濱蕩中征鴈亦來賓如今鴈至應相感
不見名潭舊主人

三井

原之西南山路崖險人迹罕到予宣和辛丑春從先祖先人避寇是山凡三宿見溪

潭多游魚俗傳井舊有龍

源泉高似銀河落石井泓然鼎足分聞說井中魚已化

定從三級上青雲

孝感井

予家有井稍大俗稱大井王家宣和壬寅秋先祖有疾思鯽魚時暑不可致先

人釣於井而得之井素無魚蓋孝感也張大猷秘書挽先人詩云玄鯽隨釣誠養親張後為工

部尚書

綸竿臨井重敝獻誠感幽潛遂獲魚解道隨釣得玄鯽

秘書好句實堪書

白巖庵

在白巖之東吾祖捨山歸明慶院而立是庵四山環合形如蟠龍前到南高山

形如舞鳳

飛鳳吹歸思竹實

庵山多竹

蟠龍高卧戀山泉吾家松檟今

三世僧舍鐘魚已百年

吾高祖母塋庵之虎山腰曾祖塋于青龍首曾祖母塋於庵前

平地先妣塋於庵後山

賈公庵

在南高山之下司理賈公塋其母兄嫂於此築庵命僧守之賈公名如規字元

範

賈公名德重吾鄉慈母難兄寔此岡手種松楸及因果
青山流水共高長

如在亭

先人塋大父母於東山立亭以寧之有詩云八堂無復見雙親見此來寧似在

神先人附塋其側某名其亭曰在來詩中語也

東山一到一雷中記得先人昔念親強把茲亭號如在
松悲柏慘見無因

如存亭

先妣墳亭
在白巖庵

北堂猶綠舊時萱寒暑無絲復清溫戲綵巖邊白雲下
慈顏彷彿尚如存

兩宋名賢小集卷一百六十四

欽定四庫全書

兩宋名賢小集卷一百六十五

宋 陳思 編

元 陳世隆 補

梅谿詩集

五

寶印叔得小假山以長篇模寫進士欽逢辰和之
某次韻并簡欽

越絕天台溫鴈蕩萬壑千巖各形狀錢塘風物更奇絕

杖屨年時記曾訪歸來戲闢小園林十里西湖藏甕盎
予嘗以甕植蓮有詞云悠然入眼皆吾山羅列軒窗一
盤池地十里西湖是

何壯止菴道人真有道種竹蒔花近丘壑何人好事贈
假山潛澗新添小屏嶂却疑遷徙從平泉更恐飛來自

秦望

秦望有飛來山飛來石

世間塵物何止此沙佛儒衣龍亦象

道人於物意豈留異日從教散天壤花木篇章兩游戲
林下高風真可尚來游蓮社有詩人句比昌黎更豪放
我休說假復論真真假通同歸一相

次韻昌齡西園十首

黃楊

予歸自武林黃楊稍枯命工去藤蔓苔蘚復有生意

黃楊庚甲與吾同樹已蕭疎
我亦翁藤蔓稍除苔蘚去
歲寒猶解傲霜風

葡萄

滿架龍鬚卷復伸
堆盤馬乳釀青春
潑醅一斗宜延客
莫博涼州學漢人

修竹

至樂齋西碧玉竿清陰時過酒杯寒明年看長纖纖筍
解籜當爲漢帝冠

梅

拂雲修竹遶吾家竹裏仍栽第一花好句更同林處士
月黃昏後影橫斜

桃

欲留王母盤中核兼採秦人洞裏薪此事渺茫花笑我
不如聊賞故園春

李

長念詩人詠子嗟
團欒繞樹日欹斜
冰盤行薦炎天實
不用東門學種瓜

杉

記得先人手自栽
森然千尺盡成材
翠絲結作思人樹
他日兒孫豈忍摧

桂

丹霄休歎路難通
學取燕山種桂叢
異日天香滿亭院

吾廬當似廣寒宮

柳

何幸先人有敝廬不妨同種柳千株垂陰覆地寧無日
作雪漫天肯似榆

菊

百花春放菊秋榮霜裏鮮鮮照眼明歲晚不妨開自笑
何須三嗅泣繁英

二月二日焚黃天色開霽賓游並集存沒有光悲

痛之餘因成鄙語

三釜深悲不逮親
九天命下責雙墳
痛將淚雜香醪奠
忍見衣隨告墨焚
漠漠濃陰初閣雨
暉暉煖日旋披雲
餘生難報劬勞德
猶有孤忠可報君

小卜園納涼

屏迹丘園世事輕
澹然滋味似孤僧
平生願學昌黎伯
宰相三書獨不能

館中三月晦日聞鶯胡邦衡有詩用東坡酴醿韻

有君側無讒人發口不須婉句某次韻

久傷伐木廢每歎吾生晚黃鳥從何來喬林綠垂憶忽
作相呼聲朋來無近遠高翥凌雲煙斜飛集池苑中有
幽谷吹遲遲下遙巘羣音巧相和出語獨不婉啞啞如
老鳥聞者弓欲挽知心有杜鵑勸爾故園返

過婺州同年王節推夷仲黃教授萬頃鄉人華主
簿子周會飲雙溪樓

年時嘗泛婺溪舟未上清風八詠樓天為故人償夙願

辛巳五月至婺溪夷仲諸同年
有登樓之約忽聞欽宗諱遂止
水知吾輩喜清流沈郎
不為吟詩瘦王粲長懷去國憂
明日山川共人遠鄉情
年契兩悠悠

種蔬

歸來日彈缺食無肉與魚
却將種花地町畦毓嘉蔬
驕陽每抱甕時雨親荷鋤
青青有生意令我顏色舒
寧憂饑與饑亦有瓶中儲
前身老闍黎

或云予前身嚴闍黎也因以戲云

蔬

氣端未除文字亦宿業
復坐魚蠹書蠹書仍食蔬
苦澹

味有餘況茲清淨根分來自僧居端能納須彌聊爾秀
郊墟洗我腥羶腸

退之詩云聲名暫羶
薌非止為魚肉也

襟宇生清虛豈

惟陶淵明吾亦愛吾廬荒園涉成趣枯藤當安輿困耽
案頭卷饑箸盤中菹孔門陳蔡色借問何如予

次韻題寶印叔蘭若堂

何處名蘭若依山結草堂花枝法雨潤心地佛燈光浮
世器塵隔空門歲月長林間有啼鳥聽法亦來翔

掃室

灑掃學者事陳蕃何不然要令天下淨端自室中先
讀書

入政慚無學還家更讀書翻同小兒輩相共惜居諸
奕碁

光景老无惜忍銷枰奕間娛賓欠絲竹一局戰清閒
昌齡欲游白石興盡而止予亦思前年之游遂次
其韻

前年蠟屐遠尋幽洞府曾經一宿留詩句親題碧雲裏

夢魂時到白巖頭風生見說欲飛去興盡何如且罷休
他日相呼老兄弟飄然杖屨共翱翔

張器先和詩復用前韻

心欲齊賢媿未齊遠蒙佳句警昏迷音如鼓瑟鏗清廟
味似煎茶鬪建溪憂國非同長卿病感時端類少陵題
二松豈是淹賢地鳬鶩文書漫抱攜

題雙瀑

女媧石爛幾經修天漏猶餘兩派流離合無心元不競

朝宗得路却相投，干雲寶劍真同氣。出蕩神龍不異湫。

鴈蕩有大小二龍湫。

何用築門防俗駕，林泉自是少人游。

雙瀑亭壞久矣。

洪丞命工起廢氣象一新，且欲築門以防俗駕，故及之。

家食遇歉有飯不足之憂，妻孥相勉以固窮，因錄其語。

淵明事高尚，瓶中缺儲粟。魯公凜名節，乞米給饘粥。廣文富才名，官冷飯不足。少陵老風騷，橡栗拾山谷。嗟予何為者，處世真碌碌。謀生一何拙，甌石無儲蓄。三年兩

去國囊橐罄水陸還家索租苗不了臘與伏前秋遭颶
風摧折數間屋今年丁火棧破甑塵可掬絕糧瘦百指
告糴走羣僕鄉鄰苟不救定恐填溝瀆家藏千卷書父
子忍饑讀一字不堪煮何以充我腹細君笑謂我子命
難食肉去歲官臺省僥倖食君祿有口不三緘月奏知
幾牘聖明儻不容寧免遠竄逐歸來固已幸富貴非爾
福東臯二頃田得雨尚可穀子耕我當耘固窮待秋熟

郡齋即事追和范文正公韻

理郡端如理亂絲范公往矣欲誰師典型猶有堂中像
光豔長存壁上詩未報國恩嗟老去不逢人傑恨生遲
一尊坐對鄱江月耿耿忠懷祇自知

郡齋對雪

平生為雪牽詩興今日無詩奈雪何淨几翻書擁爐讀
冷齋呵硯帶冰磨寒江獨釣句思柳銀海光搖人憶坡
欲兩三杯賀豐歲却憂疆場正干戈

子應和詩再用前韻

江東臘雪為誰多清逼官梅興動何堂坐玉芝勞想像

州宅有玉芝堂

句工冰柘老研磨賡酬往事思蓬島

辛巳春館中唱和最

感災異狂言忤諫坡

是歲上元雷雪併作某嘗論災異諫坡不悅

聽取金華

新號令要須白戰不持戈

閏月三白二首

閏月生明後

初四日雪作

江天未臘時風翻禹門浪花糝月

宮枝

桂花一枝秋三枚

照夜皎珠樹秀庭祥玉芝定知年大有何

止麥相宜

迎臘雪三白未春花萬株神仙森玉府天象聚台符詞
吐水流峽鼎成風擊湖鬢邊絲可織四皓盍添吾

和洪景廬用三白韻作四白詩

大似佛世界端如玉燭時穆家兄弟味楊氏子孫枝楊

四世為公以清白名家

鄞海明瑤柱

四明出光瑤柱

鄞亭望秀芝

鄞江有四望亭

北望芝山州宅有芝秀閣

祁寒繇政拙去倍二誠宜

楚士照千乘韓梨夸數株舜門紛執玉堯岳銜分符寶

結文房友鑑明狂客湖郊圻正多壘兵會憶夷吾

兵車之會

四

臘盡日又雪洪復作五白詩再和

天地俱同數嘉平欲盡時柳飄彭澤絮松壓大夫枝越

絕山飛洩

越有瀑布名五洩

文登石產芝

登州海上五岳皆生石芝

濫騎為

郡馬深願穀相宜

日掩雲間色

李嶠詩雲間五色滿

榆栽天上株芳聯仙桂籍窮送

舊桃符遠岫明廬阜澄江接帶湖宣麻開晉國入蔡憶

金吾

裴晉公五拜相金吾謂李祐也

不欺室三字叅政張公書也筆力勁健如端人正士儼然人望而敬之因成古詩八韻

雲山老人國大老歷代遺編既探討餘事游神翰墨間
乘興濡毫快揮掃嚴霜烈日如魯公抉石奔泉陋徐浩
國朝君謨書第一大字劣於行興草雲山心畫無不長
筆力縱時書更好我來求字益求人不為有官緣有道
紫岩之銘雲山筆不欺室中雙至寶玉簫峯下梅花溪
願學雲山歸去早

送翁東叟教授

三十年間舊友生，眼青頭白見交情。
官於湖北況尤冷，詩不江西語自清。
行李少留吳芮國，夢魂先到謝公城。
扁舟便合相隨去，薄有田園正可耕。

送蔡倅

白首論文得蔡侯，江東尊酒半年游。
龍頭家世高千佛，驥足聲名重一州。
方喜同僚吳芮國，不堪回首仲宣樓。
送君撩我思鄉意，薄有田園歸去休。

李懷安擁麾入蜀道出鄱江見贈二詩依韻奉酬
不肯隨羣慕鶴軒慨然丹陛吐危言坐看蜀道平如地
可見忠臣勇似尊駟馬橋邊驅弩矢杜鵑聲裏擁旂搖
要須入境詢風俗首訪嚴遵李仲元

一麾出守楚東城邂逅論交媿孔程元禮仙舟行色好
子猷雪棹去心輕虎符稔服君家世鴈蕩行逃我姓名
酒盞詩篇話時事江湖何日更尋盟

子應贈蜀中石刻十卷詩以謝之

金華石刻滿西州不惜明珠輒暗投詩泣鬼神追雅頌

義深君父妙春秋

公有答春秋書深取左氏義深君父

隨身連軫崔評事

插架懸籤李鄴侯掃室焚香讀終卷光芒萬丈照螺洲

次韻嘉叟讀和韓詩

孔孟久不作況雄莫能和韓公生有唐力欲拯頽挫文

興八代衰學救諸子過佛老蔓中華微公枉其左餘事

以詩鳴語險鬼膽破汗瀾高駕天提敏劇飛等騎龍歸

帝旁玉日人間墮汗流籍湜輩圭璧分半箇柳和辭擬

騷郊聯語成些咸知泰山仰誰繼北窗卧我本齷齪生
久供筆硯課幽香摘天葩光豔拾珠唾後公三百年杖
屨無從荷世無六一翁孰知珍古貨已詞擬陽春僭竊
罪宜坐神交有吾宗涉世同坎軻學繼青箱王詩高碧
紗摘魁令添和篇才薄知何奈謬同赤效白深媿愈知
賀世事置勿論蚊睫蟲容麼

元夕次何憲韻

火樹銀花遍九衢天移星斗下空虛心憂機婦寒窗士

詩句分明似諫書

鄱陽燈火類殘星風雨那堪更滿城為郡何如在家好
長檠不似短檠明

喻叔奇采坡詩一聯云今誰主文字公合把旌旄
為韻作十詩見寄某懼不敢和酬以四十韻

斯文韓歐蘇天下三大老蘇門六君子如籍湜郊島大
匠具明眼一一經選攷豈曰文乎哉蓋深於斯道諸公
既九原氣象日衰槁山不見泰華水但識行潦詞人巧

駢麗義理失探討書生蔽時文習義未易討著述豈無人紛紛漫華藻有如分裂時僭為各城堡同年廣文君所作非小好高吟薄風雅古學窮渾灝讀史正豕亥觀詩辨形天千篇冰玉清萬字波瀾浩心慕大手筆所恨生不早鄉令門及韓不類端可保賞識遇歐坡當為篋中寶聲名終不掩光豔姑自葆嗟我最不才兀兀首空皓半生槐踏黃晚景蓋張阜出守屢及瓜還家僅嘗稻

去六月還家
九月赴泉山

田園荒淵明江海客張鎬塵埃未能脫憂

患苦相惱愁攢卧蠶眉

相者謂予眉如卧蠶主多愁苦

痛徹伏犀腦

近苦

頭疼

何當歸故山已書下下考鍾筆況久閤盧經徒獨抱

古文如金城偏師詎容擣小詩時自遣句法未知造廣

文賢關舊聲氣同濕燥食共朝齋辛案對夜螢篋策杖

游西湖尋梅插晴昊都留九十日呼酒羅脯棗潯陽三

年別心若風中燄書來問寒溫仍效世俗禱手寫十新

詩價重百礫礚情意何勤勤許與太草草那能把旌旄

但可供灑掃何為以西子國色沈嫫媿前言蓋戲耳細

讀笑絕倒却將寄來詩錄附雅戲崇

叔奇嘗作雅戲集

兩宋名賢小集卷一百六十五

欽定四庫全書

兩宋名賢小集卷一百六十六

宋 陳思 編

元 陳世隆 補

梅谿詩集 六

郡圃栽花

公餘吏隱不相賒杖履園林賞物華五柳宅邊誰種柳
百花樓畔漫栽花

郡圃有
百花樓

池塘有夢吟春草

永嘉有
夢草堂屏

障無心戀綺霞

綺霞亭

來歲游人應話我鴈山深處老桑

麻

二月朔日同嘉叟蘊之訪景盧別墅用郡圃栽花

韻卽席唱和

鄮水芝山四望賒雨餘風物陪光華名園種果仍修果
妙手栽花似判花行見晉公開綠野聊從子美酌流霞
坐間賓主皆人傑我質如蓬賴倚麻

野處名園境界賒夷堅博物似張華

景盧作夷堅志

參天先種

柳州柳

園中新植柳

照眼兼看花縣花

國興縣圖為鄰

即席賦詩袍

奪錦論文對酒臉生霞自慚衰病陪行樂策杖登城脚

欲麻

還舍復用前韻以寄

負郭園林路不賒杖藜徐步賞韶華芹宮地近分流水

園近州學

芝嶺風高送落花

園在芝山門范丈正芝山詩花落入城東

簷外梨

枝春帶雨

梨花堂

城頭桃樹晚蒸霞

城上皆種桃

行看共掌絲

綸美寧復丘中詠有麻

舍人兄弟皆掌絲綸和詩有醉傍西岡學種麻

景盧嘉叟各和詩五首復用前韻

草堂相去不多賒
雨後登臨喚革華
心喜淵明尊有酒
眼驚太白筆生花
來看四澤滿時水
歸見九光披處霞
是早陰雨至晚見日
得兩使君詩十首
郡齋傳寫費川麻

用韻懷何卿

送別鄱江日未賒
詩人相問憶金華
烏衣巷口見歸燕
何如金陵
萬里橋西思浣花
持節要先蘇赤子
攝身未用踏

蒼霞

何頗喜仙

行將歸侍玉皇案
不比少陵鞋用麻

嘉叟和詩至七篇有何時五畝成歸計來作鄰翁
伴藝麻之句某鄉心方切復用韻

學繼初寮事業賒閉門寧悔讀南華符分興化日烘荔

室寓維摩天雨花

宗丞寓居僧舍

故里君應懷北岳歸心我已

到飛霞

永嘉有飛霞洞天

休休莫莫宜閒處耕有添丁婦織麻

王芝堂

范文正公名

不是因三秀名堂意自深要居森戟地毋忘采芝心

退思軒

會得名軒意公餘坐片時退思何及矣未退早須思

景盧贈人面竹杖

奔走方嗟力不任得公一杖直千金竹能有面如人面
人亦虛心似竹心渡水只愁龍欲化入山應與鳳聯吟

翰林虞部相酬贈同舍交情復見今

退之赤藤杖歌云
歸來捧贈同舍子

予與洪亦館
中同舍也

鄉人項服善宰鄱陽有政聲人惜其去用郡圃栽

花韻作詩數篇叙別遂和以送之

七歲名師世胄賒雲孫行實副文華仁心馴及魯恭雉
和氣種成渚岳花清白見知鄱水月高明相照楚天霞
送君撩我思鄉意遙想吾廬日長麻

鄱江同事半年賒直諒何人似去華吏報園扉多鞠草

民歌枯木再生花

邑人有枯木
再生春之謠

暫留蕭寺行逢雨剗作

新詩語帶霞褒德自應侯卓茂清朝知己況如麻

江東回首莫雲賒寒食令人感歲華皎皎丹心惟望日

是日
祈晴

星星短髮不簪花書傳何處山名鴈

寄家
書

酒憶吾

鄉水似霞

樂清有赤水之名
鄉人喜造紅酒

故舊相逢如問我為言多

病服天麻

公真有德如元令我媿無才似李華
話別芝堂傾竹葉
送行鄱水漲桃花
眼看三匝烏逢月
心羨齊飛鶯趁霞
他日相期訪劉阮
分桃采藥飯胡麻

予向年少不自量因讀韓詩輒和數篇未嘗敢出
以示人蓋二十年矣近因嘉叟見之不能自掩且
贈以長篇蒙景盧繼和用韻以謝

少小思尚奇薰風琴欲和規模與時背場屋屢摧挫大

道窺五原高論讀二過神游京城南

南山詩

思渺茫水左

竹看金影碎菊擷霜風破論文摩巨刃薦士躬彊筭蕭

蘭發秋懷木鴈吟齒墮飛飛雙鳥鳴不數鸛兩箇幽幽

十琴操可僕蘭臺些光餘萬大長照我一牀卧未終三

百篇正坐短檠課

韓古律詩共三百餘篇初妄意欲盡和之以方作舉業遂止

不敢

示友朋懼遭泥滓唾文章吉太守臭味夙相荷索我舊

詩案贈以千金貨郡齋哦好句豔豔月照坐端如陳琳

檄快讀痊臆軻濫把江湖麾謬聲慚日播祁寒兼苦雨
怨嗟吾豈柰竊效衡山禱

是日祈晴

因思鑑湖賀

時已鵬鸚乞祠

各道遙溟蓬無巨麼

二月十五日祈晴十七日雷雨再作

清香一瓣乞晴回準擬陽光萬里開風伯未吹雲陣破
雷公又喚雨聲來補天石爛疇能鍊陷濤車深不易推
誰坐黃堂稱太守深慙無術裒天災

喜晴再用前韻

天閔斯民意已回羣陰不掃自應開扶桑曉日曛曛出
玉宇清風習習來水綠漁翁聲欸乃月明詩客手敲推
秧針刺水麥搖浪定有豐年無後災

徐孺子亭

一室不暇掃心期掃天下一榻不妄設所待必賢者南
州傑出士林泉事瀟灑閉門謝弓招道合不吾舍誰云
性少通得一不為寡豫章豈私交端欲重宗社漢廷無
此賢忍使遺在野文章薦天闕聘禮備車馬高人竟不

屈清風凜華夏寄聲郭有道一木難支厦肯同樊處士
聲名祇虛假鷄酒弔知音韜光老松檟儻令居孔門行
藏似回也江西今仲舉吏事飾儒雅神交千載友丹青
妙摹寫作亭古東湖鱗鱗萬椽瓦序嘆滕王閣詞逼長
沙賈佳客從公游湖光瑩尊尊孺子真可師世途何土
苴行矣浙東西鉏犁各歸把

易芝山五老亭名曰五峯安國書之因成短篇

三秀呈祥處危亭壓衆坡眼驚廬阜近峯類夏雲多喬

嶽神咸會蒼穹頂共摩紫微新鐵畫輝映楚江波

游圓通寺

夾徑森森鬱老松烟霞深處忽聞鐘虎溪水隔侯溪水

馬耳峯聯石耳峯遺像人猶思後主

李後主功德院有祠堂

開山

僧不畏先鋒

僧言曹先鋒翰下江州至圓通主僧趺坐不懼

明朝杖履山南去

噴沫飛流看玉龍

三峽橋

三峽橋邊杖履游此身疑已到夔州題詩欲比真三峽

深媿詞源不倒流

澹澹瞿塘在眼前便應從此上青天秋風脫葉隨流下
疑是千帆出峽船

宿栖賢

瀑水聲中夜不眠星河影動半天誰云澹澹瞿塘遠
只在洋澗左蠡邊獅子吼成方外法

獅子山

石人參得定

中禪

石人峯

住山五老知今古借問曾栖幾箇賢

廬山紀游四十韻

我性好山水思向廬山廬五老招我游有約芝山初茲

行適所願孰曰非天與入眼庾公樓興已先簾輿雲開

聖治峯石扣仙人居

太平興國宮有聖治峯劉仙石

香爐望烟靄淨社

觀芙蓉虎溪聊自笑天池步宜紆

天池最高不及游

半月圓通

留幽亭樂有餘

寺有至樂亭

趣如六一翁境似山環滁侯溪

煮月泉石耳供巖蔬

峯以生石耳得名

破戒戲魚酒踏園夢羊

猪賢闌得家音

二兒時在太學一日得兩書

天恩拜新除抗章復辭

免

前辭夔州今辭名對

行色仍躊躇遂作南山游首過荆林虛凌

雲入康谷臨流清可漁欲飲第一水山深足趑趄湯泉
本何來忽從龍口噓鸞溪尋故家

歸宗寺本
王右軍宅

墨沼波猶

瀦石境不可見懸崖照誰梳尋真到簡寂入觀驚丘墟

緬懷黃與陸何處飄霞裾

簡寂觀乃陸修靜道場
有黃石公巖觀今荒廢

眼明

見飛瀑澗壑鳴瓊琚河落句思李練飛詩陋儒新橋跨

虹霓出月明蟾蜍兩州勞五馬同日傳雙魚

至開先得
唐江州李

南康書神光照萬杉飛白留天書遙瞻星子城青山點春

鉏我行未及西三峡知何如登樓閱天險奮地轟雷車

壯哉五丁力鑿此千尺渠羣峯列耆老深淵蓄璫璵

五老

諸峯及三峽玉淵並在棲賢

古刹依朱砂穿林駭猿狙

楞伽在朱砂峯下自棲賢

一路穿荆棘而行

萬卷已空閣三竹猶扶疎肩輿足繭卒傳詩

手疲胥佳境尚無窮雅興良已攄身隨禽往還興逐雲

卷舒重尋訥庵老細論無言予節物變炎涼遲留費居

諸在路何悠悠歸夢頻蘧蘧秋風鴈還蕩緘封寄鄉間

中秋宿灤溪驛

瑞昌縣

半月游廬阜中秋宿灤溪祠尋元子隱

元次山舊隱

樹認赤

烏樓

吳赤烏所見之地

坐待雲開月行愁雨作泥都人應話我

身在九江西

題一覽亭

在潛臺後山

危亭頂鄂渚欲上初不敢肩輿躡崢嶸眼界驚坎窞青
山繚江湖烟雨抹濃淡千帆破滄浪萬里照齒齒大澤
胸可吞秀色手宜攬形勢控上游天險卦侔坎登臨迫
吹帽秋聲在葭莢銜杯情有欣懷古意多感兩雄孫與
劉壯志鯨鵬噉赤壁走阿瞞功業炳鈎槩黃鶴去何之

靈竹色猶慘樓餘庾公興洲遺正平憾北望舊中原激

裂壯士膽何由登太山一快天下覽

赤壁之說有四在鄂之蒲圻者是孫

權遭周瑜與劉備併力敗曹公於是

過金口市江中有渚名鯉魚甲渚上有蘆花連日

遇逆風舟以寸進挽舟者行蘆中成四絕

江山滿眼似相迎一閑人煙間地名舟過已經金口市
水流應到石頭城

鯉魚甲露江中渚蘆荻花浮渚上霜檣影落江疑是釣

巨鱗驚躍鷺飛忙

長江十里渺連空
逆水那堪更逆風
定是江神憐遠去
欲吹船轉浙江東

江神不借一帆風
急水難收寸進功
敲枕高眠真有愧
挽舟人在荻花中

宿高牙

牢落楚天涯
夔門路尚賒
落帆驚宿鷺
弭榜傍栖鴉

有鴉

千百羣風伯聲喧枕
漁人水浸家
江神阻行色
非是戀

集於柳

高牙
兩宿

亡姊之塋在九月而不得其日十五日讀坡詩至
英公燎須事不覺悲涕是日辛酉得非塋日耶詩
以寓哀

先人六兒女姊長孝且慈德淑命不淑哀哉止於斯莫
年失愛子哭泣鬢成絲年纔五十七一病不可醫姊死
我在傍姊塋吾不知初聞卜九月不知日與時丐祠既
不遂臨穴竟無期日月為我昏風雨為我悲宦游何所

得抱恨湫無涯尚餘英公須未作子厚碑

嘗欲作墓志不遂

便

當回鴈蕩那忍過姊歸

姊歸縣在歸州有屈原故宅原既被放流忽然自歸原有賢姊

曰女須亦歸喻令自寬離騷所謂女須之嬋媛兮是也袁崧以為姊歸之名始於此

宿網步時已入夜猶行舟忽聞犬聲知有人家孤

燈一點蓋漁舍也是夕有月不飲

網步知何處維舟日已昏孤燈耿漁舍一犬吠江村問

境欣名復

在復州界

歸心幾到溫遙天有明月惜不照金尊

宿金鷄渡

曉起鷄未鳴晚宿雞鳴渡鷄鳴又還起扁舟觸烟霧不
作田文奔不效劉琨舞孜孜慕舜徒去去官夔府

舟中記所見

不向三苗境上過

岳州乃三苗故都

此身端怯洞庭波浪翁未

免教牙戲漁父時為欵乃歌蟲喜年豐頗擣米鳥憂沙

漲自淘河

擣米淘河蟲鳥名

可無好處如鄉里橘綠橙黃恨不

多

上大望州鑽天嶺

身到猿啼百尺頭

百尺坡

更言前有鵲孫愁試於大望山

頭望望見人間是峽州

豆子山前火墨溪迢迢一嶺與天齊肉身安得鑽天手

肝膽崔嵬自作梯

題諸葛武侯祠

八陣圖旁丞相祠風雲慘淡會當時功成豈止三分漢
才大非惟十倍丕渭上忽傳司馬走蜀中長起卧龍思
我來再拜瞻遺像淚滿襟如老杜詩

登詩史堂觀少陵畫像

萬丈光芒筆有神
兩眉猶帶舊酸辛
殘杯不復愁肥馬
賸馥端能丐後人
夔子江頭吟處景
杜鵑聲裏拜時身
敬瞻遺像觀詩史
一酌雲安麴米春

游東坡八絕

道大才高世不容
堪嗟尺水困神龍
空游赤壁英姿發
卻向小橋詩思濃

出處平生慕樂天
東坡名自樂天傳
文章均得江山助

但覺前賢畏後賢

忠州東坡以樂天得名

少年下筆已如神
文到黃州更絕塵
我宋人才盛元祐
玉堂人是雪堂人

世重元之重竹樓
雪堂名更重黃州
西山草木尤光彩
一一曾經杖屨游

再聞黃州正坐詩
詩因遷謫更現奇
讀公赤壁詞并賦
如見周郎破賊時

供成詩案脫纍囚
天遣公來此地游
自有胸中雲夢澤

更居雲夢澤南州

口誦淵明歸去詞岷峨歸去竟無期
高安難弟來相訪
細說對牀風雨時

批風抹月五經年吟盡淮南盡處天
獨與元之韓魏國
神交千古作三賢

兩宋名賢小集卷一百六十六

欽定四庫全書

兩宋名賢小集卷一百六十七

宋 陳思 編

元 陳世隆 補

梅谿詩集

七

游卧龍山呈行可元章

我輩逢山眼即青卧龍頂上喜同登
圖留沙磧懷諸葛
詩誦江濱憶少陵
巫峽雲飛天一握
瞿塘魚化浪三層

欽定四庫全書

兩宋名賢小集
卷一百六十七

俗謂瞿塘籃輿又向人間去回首林泉媿老僧
峽為龍門

題卧龍山觀音泉呈行可元章

去歲游廬山社中觀白蓮不飲遠公酒聊酌聰明泉肩

輿過武昌乘輿西山巔巖乳飲菩薩詩篇誦蘇仙

武昌西山

有菩薩泉東坡名之

夔州苦無井瘿俗殊可憐竹筩喉不乾可浣

不可煎日汲卧龍水屢賴擔夫肩所取都幾斛深慙未

投錢前日招提游入耳聲涓涓泓澄可照膽草木皆光

妍却疑南陽人蟠螭清冷淵慘淡會風雲滂沱霖普天

源如少陵詞清入光芒篇餘波漲瞿塘洶涌吞百川何
人著水經漏此不及編道人出新茗林間手新研共以
夷齊心來結觀音緣至今清夜夢猶到幽亭邊交游況
離索回首成悽然

元章移節西州

何時鹿呦呦重訪山中禪

僧言

前日吾儕將至山中鹿鳴

送元章改漕成都

取友四十載普天半交游蒹葭羣玉堂莫盛登瀛洲元
章真國士未見心已投雅抱猷猷志共懷天下憂館閣

育人材孰云專校讐慷慨論世事不見范尹歐疆場況
如許寧不憂宗周精忠屹肝膽苦語驚冕旒君去最勇
決我行尚遲留初別擬十載相逢忽三秋龍飛起元老
江淮握貔貅禮羅得奇才我幕資良籌人事苦好違壯
懷莫能酬去持夔州節遙泛瞿塘舟我亦來自鄙茲行
豈人謀八陣觀壯圖三峽窺倒流訪君義勝堂顧我制
勝樓如馬謁白帝卧龍尋武侯江亭覽月色園花賞春
柔果分餘味甘蘭贈深林幽詩篇浩卷軸墨妙輝山丘氣

薄文豔杜詞卑竹枝劉吏事容拙疎交情荷綢繆綸
言下北闕繡衣使西州流錢豈君事易地曾何優何不
班玉笋入告嘉謨猷巴子國最貧瘡痍民未瘳君去誰
撫摩欲借嗟無由我已上詞章歸歟老田疇遲君還日
邊寄書到東甌

次韻韶美失舟閑書

醫師籠參朮良將枕戈矢儒生嗜底物書卷掛口齒劉
侯西南來歲月十首尾閉門閱古今過眼分亥豕異書

照神藜奇字哭妖鬼許身如蠹魚文字共生死風流反
得罪去國果誰恥仙舟載秘閣便腹貯名理江神亦世
情逐客多不喜厄同焚書秦惡類滅邢燬沾濡徧箱篋
痛惜到骨髓我初聞為驚終夜成坐起得君詩細讀罪
已不罪水願言坐嘯餘書著子劉子

餘干翁簿以予去饒之日郡人斷橋見留畫圖賦
詩見寄因次其韻

我慕鄭子真躬耕老巖谷不慕蘇季子腰金詫宗族失

腳落塵網回頭念幽獨向來鴛鴦行進退慚碌碌把麾
鄱君國飲水清灣曲緬懷九賢人痛閔千里俗奉揚之
仁風黎庶困炎燠疇能政有成敢望諾無宿厚顏叨祿
廩汗背擁旌纛命下忽變門諸公孰推轂水陸三千里
湖重嶺仍復至喜謁文忠秭歸懷李龔鄱人憐老守去
類楚臣逐出門橋已斷擁道額爭感初無龔黃政濫繼
秦侯躅仇香舊同僚別寄兩竿牘賦詩仍畫圖開卷宛
在目清音滿于越餘韻到巴蜀我有二頃田荒蕪鴈山

腹願畫歸去來芒鞋事耕育

齒落用昌黎韻

我來饒興夔三載墮兩齒懸知年非永早悟仕當已要
須未落時猛效二疏止何為一再落不已良可恥慨然
懷古人未有長不死因思年方少輩行多勝已顏紅齒
牢潔往往同逝水吾雖沈如許寧復老彭比覽鏡視顏
色今昨不相似行年五十五萬事可休矣功名與富貴
磨滅何足紀但願早還鄉脩育三百指婚嫁畢兒女松

楸依怙恃弟兄飲真率故舊忘汝爾齒牙任搖脫肉食
吾不覩有身久為患無齒實堪喜始憂笑韓公可惜陋
子美未必傷我心茲言聞柳子

送喻令

捫膝先生有鳳毛三年魚邑試牛刀要令人被絃歌化
詎肯身辭州縣勞賢令首祠唐質肅詩篇時出楚風騷
西歸更勉家傳學雲翼行看九萬高

閩普州趙果舟中唱和以詩軸見寄訓以二首

聯舟西上沸歡聲趙壁隋珠照坐明二客詞流三峽水

百篇詩壓五言城廣文舊舍欣同掃

閭嘗為夔府教官

阿買奇

兒況待行

果州二子皆善作字

我以禮賓名客館雲安麴米待君

傾

燈結寒花鵲有聲書傳雙鯉眼增明人言盡是青雲士
天遣相逢白帝城富貴有機端可畏山川非險莫辭行
定知蜀道從今易東魯南充蓋已傾

至日寄二弟

雲物書何處山城白帝旁鬢絲驚漸短日線喜初長
江冷魚思復陽回鴈戀行小舟吾已具命下即還鄉

連日鵲喜東歸之祥也詩寄二弟

烏鵲枝頭竟日喧皇恩應許返丘園荒蕪賦就同元亮
歡喜詩成異審言定有好音來象闕魄無遺愛在夔門
寄書預報梅溪弟灑掃吾廬辦酒尊

聞韶美侍郎易任廣漢

帝眷甘泉舊綸恩換虎符神應馳北闕眼已見西湖

漢

湖西霖雨思賢甚仙槎到漢無書梁形夢寐大厦待公扶
閱報之夕夢韶美
大書兄字於梁間

臘日與同官小集八陣臺觀武侯新祠

伏幾何時臘又逢天涯尊酒記游從未於山下祠黃石
且向江濱謁卧龍青眼共看官舍柳白頭相對雪天峯
虎符願逐桃符換萬里歸心一片濃

讀東坡詩

東坡文章冠天下日月爭光薄風雅誰分宗派故謗傷

蚍蜉撼樹不自量堂堂天人歐陽子引鞭遜避門下士
天昌斯文大才出先生弟子俱第一天人詩如李謫仙
此論最公誰不然詞無艱深非淺近章成韻盡意不盡

味長何止飛鳥驚臆說紛紛幾元稹

有言歐公詩味短者王介甫云行人

舉頭飛鳥驚之句味亦甚長

渾然天成無斧鑿二百年來無此作誰

與爭先惟大蘇謫仙退之非過呼胸中萬卷古今有筆
下一點塵埃無武庫森然富摘拔利鈍一從人點檢莫
年海上詩更高和陶之詩又過陶地闢天開含萬彙少

陵相逢亦應避北斗以南能幾人大江之西有異議日
光玉潔一退之亦言能文不能詩碑淮頌聖十琴操生
民清廟離騷詞春容大篇騁豪怪韻到窘束尤瑰奇韓
子於詩蓋餘事詩至韓子將何譏文章定價如金玉口
為輕重專門學向來學者尊西昆詩無老杜文無韓淨
掃書齋拂塵几辦香敬為三夫子

除日

蝸舍三年別夔門兩歲除盆雖具肴簋儼不是鄉閭榼

馬喧新集桃符換舊書何如杜陵老守歲阿咸居

甘露堂前有杏花一株在修竹之外殊有風味用

昌黎韻

桃李未吐梅英空杏花嫣然作小紅孤城絕塞地不惡
一株綽有仙家風高枝半出修竹外醉臉畧與江梅同
夔州花木不多有封植嘉樹知誰功春光忽到刺史宅
天氣正在中和中不同浪藥落瘴霧自有甘露滋芳叢
我來歲律驚兩換歸興遙指吳江楓曲江往事何足夢

願為老圃安我窮明年花開我何處小園數畝蕭臺東

蒼蒼煙雨記巫峽酣酣詩句吟梅翁

梅聖俞詩杏花酣酣春正明

郡圃無海棠買數根植之

少陵詩史有遺闕海棠名花輒湮沒孤芳千載逢蘇仙

竹籬一笑嫣然發我從蜀錦亭邊來

范文正公守鄴公種海棠于郡圃名

亭曰蜀錦遙入蒼蒼烟雨窟綺霞曉抹神女肌香醪春醉明

妃骨鮮鮮絲藥垂更媚點點燕脂勻未歇半含欲吐不

勝情沐露梳風睡明月為開尊酒苦多病欲插一枝羞

白髮照眼千株未觀蜀回首十年深憶越

往在會稽訪諸名園海棠

最何人好事呼名友姚魏不容矜閥閱

曾端伯十花詞目海棠曰名友

牡丹不與

凝香有地何不植負郭無園何處謁不煩飛鵲銜

子來自買芳根帶花掘明年高堂來燕子想見繁紅映
林樾栽花老守在何許鴈蕩山中采薇蕨憑誰為問花
消息有夢遙驚山突兀自慙不是名伯崇那得詩人歌
勿伐

次韻林江州題高遠亭

眼明廬阜翠橫空疑是雲頭屹夏峯遗迹君應懷聖治

聖治峯在太平興國宮

故家我亦念歸宗

山南歸宗寺乃逸少舊游

遙瞻瀑水

三千尺猶隔巫山十二重亭上主人高更遠天然丘壑
在心胸

詩史堂荔枝歌

君不見詩人以來一子美莫年流落在夔子賦詩三百
六十篇西瀼東山客愁裏何人作堂畫遺像收拾光芒
榜詩史堂前何有有荔枝樹猶未老熟獨遲世人貴早

不貴晚儻非我輩誰賞之涪陵昔遭妃子污萬顆包羞
莫能訴瀘戎一經少陵壁至今傳誦輕紅句少陵傷時
淚成血一點丹心不磨滅散成朱實滿炎方風味如詩

兩奇絕樂天曾畫忠州圖自言香味人間無

樂天詩云
嚼疑天上

味嗅異
世間香

君謨亦作閩中譜陳子聲名重南土何如詩史

堂前株正是一飯孤忠餘人為世重物亦重端如丈人
屋上烏巴圖閩譜合避路奚用品第分錙銖纔先熟者
如楊盧但可與之作前驅閩娘十八婢妾爾將軍大樹

真備奴我生四百餘年後來作先生游處守登堂三數
荔正丹聊效柳人祠子厚安得先生今復生添賦夔州
歌一首

少陵有夔州歌十首

要使荔枝之名長不朽

岳陽樓

後樂先憂記飽觀茲樓今始得憑欄吐吞五水波濤濶
出納三光境界寬黃帝樂聲喧廣宙湘君山影浸晴瀾
江山何獨助張說收拾清詩上筆端

過仙亭

此處神仙幾度經
老松枯朽穉松青
如今想作天仙去
不復飛吟過洞庭

池之清溪如杭之西湖
某歸自三峽維舟弄水亭
南望齊山翠微在眼登譙樓望九華見一峯奇甚
呈提舉李子長知郡趙富文

城南風物似西湖
萬里歸舟入畫圖
光潔貯懷便弄水
翠微照眼稱提壺
浦無時節秋尤好
池有精神貴可呼
最是九華知客意
倚天遙露一峯孤

子長和詩復酬二首

往歲遙從彭蠡湖常山地閱武侯圖忽乘雪裏子猷棹
欣對花間太白壺鴈宕寄書知有便天台采藥定相呼
兩翁異日為鄰舍笑說江山大小孤

君往東湖我左湖田園歸去亦良圖縱如傳說妙調鼎
終羨淵明高引壺清峭臺中各陳迹翠微亭上偶歡呼
江東江右從今後永夜月同千里孤

子長招游齊山

路經秋浦上崔嵬不負孤舟萬里回峯比九華微具體

山中
有石

洞疑三竺遠飛來勝窮巖石玲瓏地秀吸江湖浩

渺盃先却紫微期一月菊花未放桂花開

朱仲文和詩用齊山韻以酬

蜀山同我上崔嵬峽水相隨共載回秋月迎人雪川去
義風吹客浙江來山游未盡無窮力酒興應嫌有限盃
準擬吳中作重九菊花休道不須開

子長和汪樞密齊山詩復用前韻

腐儒無用分投閒吳蜀分符祇強顏去訪少陵三峽水
來尋太白九華山小舟載酒清溪口健卒傳詩白浪間
風伯相留作吟社願低筆力許追攀

池陽阻風留十日

舟楫何濡滯秋深風未西五旬從白帝十日尚清溪胸
次澤吞楚眼中山見齊主人殊未厭壺榼屢提攜

子長攜具至溪口復用前韻

有客雙蓬鬢歸來灩澦西符分三竹使地見兩梅溪

舟行

梅溪予家舟遇先逢李孟行酒到齊他年石橋路歸去
亦有梅溪
手應攜

九華山

九芙蓉自九天來太史南游山未開仙境曾經謫仙眼
佳名傑句兩崔嵬

舟出清溪尚逆風觀山却得少從容浮雲不礙天邊眼
放出神仙八九峯

我在芙蓉山下家四年秋色隔天涯如今漸覺鄉山近

已見芙蓉吐九華

江南一嶽占青陽多少神仙此地藏聞說仙翁搥藥處

鳥聲依舊克丁當

山中有鳥啼聲曰克丁當時人呼為葛仙翁搥藥處

九華山下化成寺太白書堂高處開想見江山無此境
故宜頭白懶歸來

兩宋名賢小集卷一百六十七